



Inatsisartut suleriaasianni § 36 naapertorlugu apeqquteqaat aallaavigalugu oqallisissatut imaattumik siunnersuuteqarpunga:

Pinerluffigineqarsimasunut ikiuisarnitta ilaatigut eqqugaasunik siunnersuisarnermik pilersitsinikkut qanoq pitsanngorsarneqarsinnaaneramik apeqquteqaat aallaavigalugu oqallinnissamik siunnersuut.

(Inuit Ataqatigiit Inatsisartuni ilaasortaaitai)

Inuit peqqarniilliorfigineqarsimasut atugaannik pitsanngorsaaniarluni qanoq iliortoqartariaqarneramik Inatsisartut oqallinnissaannik siunnersuut manna siunertaqarpoq.

Danmark Kalaallit Nunaat sinnerlugu Kalaallit Nunaanni inatsisinik atortitsinermut akisussaavoq. Inatsisinik atortitsinermut tunngasut pitsanngorsarneqarnissaat Naalakkersuisunit sulissutigineqarpoq suliassa qarfiullu ineriartortineqarnissaanut periaasissamik aalajangersimasumik saqqummiussaqaassallutik. Inatsisinik atortitsineq pillugu politikikkut oqallinnerit ullumikkut annermik pinerluuteqarsimasunik inissisarfimmittussanngorlugit pineqaatissineqarsimasunut tunngasuupput eqqugaasullu annerusumik eqqartorneqassanatik. Taamaammat inatsiseqarnermut tunngasut pitsanngorsarnissaat siunertaralugu Folketingimi Inuit Ataqatigiit politikikkut suliniutissanik siunnersuuteqarput. Taassuma qulequtaraa "Kalaallit Nunaat toqqissisimanarnerusoq".

Eqqugaasut amerlasuutigit eqqartuussivilersuussinermi ilisimannittuusaraluarlutik annerusumik sammineqarneq ajorput. Eqqugaasut pineqarnerminnik suliarinninniarnermi ikiorneqarnerat sullunaqaaq. Ikiorneqarnerat allatigit aammalu inatsilerinerup avataatigit amerlanertigit pisarpoq – amerlanertigit kommunit aqutigalugit, kisianni allatigit ikiorneqarnissamat piffinni tamani periarfissat ajornaatsuinnaaneq ajorput.

Eqqugaasut aningaasatigit taarsiivigineqarnissaannik qinnuteqartoqarsinnaavoq, kisiannili aningaasatigit taarsiissuteqartoqarnissaata annerusumik isiginiarneqartarnera eqqugaasunut qaqtuguinnaq oqiliallaataasarpoq.

Inuit peqqarniilliorfigineqarsimasut atugaannik pitsanngorsaaniarluni qanoq iliortoqartariaqarneramik Inatsisartut oqallinnissaannik siunnersuut manna siunertaqarpoq.

Ukiuni kingullerni inatsisinik atortitsinikkut qassiinik ineriartortitsisoqarsimavoq. Ilaatigut eqqartuussiviit illutaannik pitsanngorsaasoqarsimammat eqqugaasut eqqartuussiviit utaqqisarfissaqartinneqalersimapput. Aamma pinerluuteqarsimasut taakkulu atugaat politikikkut sammineqarput minnerunngitsumillu inuiaqatigiinnut qanoq uterteqqinneqarnissaat sammineqarsimalluni.

Nunarsuarmioqatitsinnut sanilliulluta pinerluttartut amerlaqaat inunnullu sakkortuuliornerit amerlaqalutik. Pinerlunnerit amerlanersaat angelarsimaffimmi pisarput. Pinerluttarnerup qaffasinnera ilaqutariaartarnerlu pissutigalugit pinerluttuliornerit kikkorpassuarnut sunniuteqaretarput.

INUIT ATAQTIGIIT

Inatsisartuni



Aamma eqqugaasut pinerluuteqartussallu imminnut attuumassuteqartarnerat takukkajupparput. Eqqugaasut eqqarsaatigalugit pinaveersaartitsiniartoqaraluarpat qularnanngilaq pinerlunnerit pinaveersimatinneqarsinnaassagaluartut.

Inuit sakkortuuliorfigineqarnerini eqqugaasut eqqartuussinermi sammineqartaqaat, eqqartuussinerilli naammassereeraangata unereeraangataluunniit annerusumik ikiorneqaratillu isiginiarneqarunnaartarput. Eqqugaasut aningaasatigut taarsiivigineqarsinnaapput taarsiivigineqarnissaminnilluunniit qinnuteqarsinnaallutik. Pinngitsaaliisoqarsimappat, ukiukitsunik kinguaassiutitigut atornearluisoqarsimappat sakkortuuliorqarsimappalluunniit aningaasatigut taarsiissutaasut eqqugaasut tarnikkut ikiligaanerinit naapertuutikkajungillat.

Siunnersuutikkut siunertaasoq tassaavoq sakkortuuliornermit eqqugaasut atugaannik pitsanngorsaaniarluni iliuuserineqarsinnaasunik Inatsisartut oqallinnissaat. Eqqarsaatersuutit tamakku Naalakkersuisut periusissiorneranni aammalu inatsisunik atortitsinikkut pissutsit pitsanngorsarniarlugit Folketingimi sulinissami ilanngullugit atorneqarsinnaassapput.

Aaqqiissutaasinnaasut tassaasinnaapput aaqqiagiinginnernik iluarsiiarnerit, eqqugaasunut siunnersuinerit, kiisalu eqqugaasunut aningaasaateqarfimmik pilersitsineq.

Assersuutigalugu Norgemi eqqugaasunut iluaqutaasumik aaqqiagiinginnernik iluarsiiarnerit pitsaasumik angusaqarfiusarsimagaluartut nunatsinni atugarinngilavut, naak aamma Eqqartuussiveqarneq pillugu Ataatsimiititaliarsuup isumaliutissiissutaani 2010-imeersumi eqqartorneqarsimagaluartut.

Atorneqarsinnaasut soorlu tassaapput eqqugaasunut siunnersuisarneq, taarsiiffigineqarnissamut periarfissat pillugu qaammarsaaneq annerusoq imaluunniit pisariaqartillugu tarnikkut ikiorneqarnissamut periarfissanik qaammarsaaneq.

Eqqugaasunut aningaasaateqarfimmik pilersitsisoqarsinnaavoq, tassa pinerluuteqartut aningaasaateqarfimmut akiliilaartarsinnaapput, taakkulu pinerluttuliorfigineqarsimasut taakkunungalu ikiuniarnerit pillugit ilisimasanik pitsanngorsaanermit ilapittuutaasinnaallutik. Aamma assersuutigalugu suliniutinik ingerlatsisoqarsinnaavoq nammineq kajumissutsiminnik suliniaqatigiiffiit ikiorsiisarfiinik aammalu eqqugaasut, soorlu kinguaassiutitigut pinerluffigineqarsimasut atugaannik pitsanngorsaaniarfiusunik.